

BAB III METODOLOGI PANALUNGTIKAN

3.1. Méthode Panalungtikan jeung Téhnik Panalungtikan

3.1.1. Méthode Panalungtikan

Tina sakur panalungtikan perlu netepkeun méthode, lantaran hiji méthode panalungtikan bakal nangtukeun alus henteuna hiji panalungtikan dilaksanakeun. Méthode panalungtikan mangrupa hiji cara atawa prosedur nu digunakeun pikeun ngalakukeun panalungtikan.

Méthode nu digunakeun dina ieu panalungtikan nya éta méthode déskriptif. Méthode ieu digunakeun kulantaran luyu jeung salah sahiji tujuan panalungtikan, nya éta ngadéskripsikeun sacara sistematis ngeunaan basa Sunda dialék di kacamatan Langensari Kota Banjar. Travers (1978) nu dicutat ku Husen Umar (1999:81) nétélakeun yén "méthode déskriptif miboga tujuan pikeun ngagambarkeun hiji sipat tina hal nu keur lumangsung dina waktu panalungtikan dilaksanakeun jeung mariksa sabab-sabab tina sahiji kajadian".

Méthode déskriptif téh ngabogaan ciri-ciri: (1) Meuseur panitén pikeun ngaréngsékeun masalah anu aya patalina dina mangsa kiwari sarta dina masalah anu aktual, (2) Data nu geus dikumpulkeun satuluyna disusun, dijéntrékeun sarta dianalisis.

3.1.2. Téhnik Panalungtikan

Téhnik nu digunakeun dina ieu panalungtikan nya éta: Studi Pustaka, Observasi, jeung Wawancara.

a) Studi Pustaka

Studi pustaka digunakeun pikeun néangan jeung nangtukeun dasar-dasar téoritis anu aya patalina jeung subyék panalungtikan anu keur ditalungtik.

b) Observasi

Observasi dilaksanakeun ku cara nempo jeung ngalakukeun pengamatan sacara langsung kana obyék nu rék ditalungtik sangkan boga gambaran anu nyata ngeunaan kaayaan daérah anu rék ditalungtik, sarta nuliskeun hal-hal nu sakirana penting pikeun kaperluan analisis. Dina hal ieu, observasi nu dilakukeun ku panulis nya éta ku cara nempo langsung kahirupan masarakat di Kacamatan Langensari Kota Banjar.

c) Wawancara

Wawancara mangrupa téhnik komunikasi langsung pikeun meunangkeun data anu dibutuhkeun. Dina panalungtikan ieu wawancara nu dilakukeun nya éta wawancara berstruktur. Dimana panulis ngajukeun daptar patalékan anu aya hubunganana jeung panalungtikan dumasar kana padoman wawancara nu geus dijieun.

3.2. Instrumén Panalungtikan

Arikunto (1996: 150) nétélakeun yén instrumén panalungtikan téh nya éta alat atawa fasilitas nu digunakeun ku panalungtik pikeun ngumpulkeun data sangkan pagawéan leuwih gampang jeung diolah. instrumén dina ieu panalungtikan nya éta:

a) Angkét

Conto angkét saperti di handap ieu:

Kuesioner Informan

Kampung:.....Désa:.....

Kacamatan: Langensari Kotip: Banjar

1. Ngaran:.....Jenis Kelamin L/P

2. Umur.....Taun. Tempat

Lahir.....

(di jéro/luar kampung/désa/kacamatan/kabupatén)

3. Atikan.....

4. Matuh di désa ti mimiti:.....

5. Kungsi/teu kungsi cicing di luar désa/kacamatan/kabupatén

di.....ti mimiti.....

nepi ka.....Balik ka désa ti mimiti.....

6. Kawin/teu kawin

7. Basa nu dipaké di imah:

a. Basa.....

b. Basa.....

8. Basa di masarakat:.....

9. Basa di tempat pagawéan:.....

10. Basa lain nu digunakeun:.....

Dina kasempetan.....

Wawancara tanggal.....2006

Di.....pukul.....

Nu ngawawancara.....

b) Padoman wawancara

Conto padoman wawancara:

Tabél 3.1
CONTO PADOMAN WAWANCARA

NO.	Kandaga Kecap	Dipikawanoh	Dipaké	Kecap Séjén Nu Dipaké
A. Istilah Pancakaki				
1.	Adi			
2.				
3.				
Jste.				

3.3. Populasi Jeung Sampel

3.3.1. Populasi

Dina ngumpulkeun jeung nganalisis hiji data, léngkah nu paling penting nya éta nangtukeun populasi leuwih tiheula. Numutkeun Suyatna (1994: 14)

“Populasi nya éta sakabéh obyék anu digunakeun bahan dina hiji kagiatan panalungtikan, boh mangrupa barang, manusa, kajadian, atawa gejala-gejala nu bakal kajadian, paling saeutik kudu mibanda sipat-sipat nu sarua. Kulantaran éta, populasi mangrupa sakabéh sumber data nu jadi obyék panalungtikan”

Sedengkeun harti populasi numutkeun Harun Al Rasyid (1994:1)
“populasi nya éta sakabéh obyék psikologis anu diwatesanan ku sarat-sarat nu tangtu”.

Léngkah awal saurang panalungtik kudu nangtukeun sacara jelas ngeunaan populasi nu jadi sasaran panalungtikan nu disebut populasi sasaran (*target*

population), nya éta populasi nu engkéna bakal jadi kacindekan panalungtikan. Jadi tina hasil hiji panalungtikan dikaluarkeun kacindekan, mangka numutkeun étika panalungtikan, kacindekan éta ngan saukur lumaku pikeun populasi sasaran nu geus ditangtukeun.

Anggota populasi dina ieu panalungtikan nya éta sakabéh kekecapan dialék nu aya di Kacamatan Langensari Kota Banjar.

3.3.2. Sampel

Sampel mangrupa bagian tina populasi sarta dianggap bisa ngawakilan populasi. Dina kanyatanana hésé pisan pikeun manggihan sampel nu mangrupa réplika tina populasi (Suyatna, 1994: 14).

Ieu sampel panalungtikan téh maké cara wilayah, nya éta ku cara milih sampel nu dianggap bisa ngawakilan anggota populasi dumasar kana ciri-ciri jeung sipat-sipat nu dianggap mibanda hubungan jeung ciri-ciri atawa sipat-sipat populasi nu geus dipikanyaho saméméhna. Ieu cara lantaran anggota populasi kacida lobana jeung hétérogén. Spésipikna nya éta kalér, kulon, kidul, wétan jeung tengah. Ku lantaran kitu ieu sampel téh disebut sampel wilayah jeung sampel purfosive, nya éta sampel anu saluyu jeung tujuan panalungtikan.

3.4. Léngkah-léngkah Garapan

Dina ieu panalungtikan léngkah-léngkah dibagi kana opat tahapan, nya éta tahapan tatahar, tahap ngumpulkeun data, tahap nganalisis data, jeung tahap nyusun laporan.

3.4.1. Tahap Tatahar

Kegiatan anu dilaksanakeun dina tahap tatahar ngawengku:

- 1). Néangan katerangan ngeunaan masalah anu rék ditalungtik (studi pustaka)
- 2). Nangtukeun masalah, judul jeung rangkay panalungtikan
- 3). Nyieun proposal panalungtikan
- 4). Ngaréngsékeun surat ijin panalungtikan.
- 5). Konsultasi ka Dosén Pangaping

3.4.2. Tahap Ngumpulkeun Data

Kegiatan ngumpulkeun data mangrupa cara-cara nu digunakeun dina panalungtikan pikeun meunangkeun data nu diperlukeun nu didukung ku instrumén pangumpulan data nu rélevan. Anu dilaksanakeun dina tahap ngumpulkeun data ngawengku:

1. Ngumpulkeun data panalungtikan
2. Ngalaksanakeun observasi
3. Ngayakeun wawancara
4. Ngainvéntarisir data anu asup
5. Konsultasi ka Dosén Pangaping

3.4.3. Tahap Nganalisis Data

1. Observasi lapangan
2. Ngumpulkeun data panalungtikan
3. Ngayakeun wawancara

4. Ngainvéntarisir data nu asup
5. Nyieun péta dialék géografis Kacamatan Langensari Kota Banjar.
6. Nyieun kacindekan tina hasil analisis

3.4.4. Tahap Nyusun Laporan

Tahap nyusun laporan, baris disusun dumasar kana aturan-aturan ilmiah winangun skripsi, nu dimimitian ti bab I nepi ka bab V. Dina bab I ngawengku bubuka, kasang tukang, watesan masalah jeung rumusan masalah, tujuan, mangpaat panalungtikan, anggapan dasar, sarta wangenan oprasional. Dina bab II ngawengku tatapakan téori, sagala téori-téori anu aya patalina jeung panalungtikan baris dipedar dina bab II. Bab III ngajéntrékeun métode panalungtikan anu digunakeun dina ieu panalungtikan. Bab IV déskripsi, analisis jeung pedaran hasil panalungtikan. Sedengkeun bab V mangrupa kacindekan jeung saran.

